

USIM tangguh pelajar kembali ke kampus

Nas Norziela Nasbah - Mei 19, 2021 @ 12:18pm
bhnews@bh.com.my



KUALA LUMPUR: Universiti Sains Islam Malaysia (USIM) menangguhkan pergerakan pelajar kembali ke kampus bermula hari ini sehingga 28 Mei susulan peningkatan kes COVID-19 di seluruh negara.

USIM dalam kenyataan hari ini berkata, penangguhan itu merangkumi semua pergerakan termasuk kolej kediaman dan rumah sewa pelajar di USIM sama ada menggunakan bas yang diuruskan oleh pihak universiti, dihantar oleh ibu bapa atau waris dan menaiki kenderaan sendiri.

Hanya pelajar yang pulang menaiki kapal terbang sahaja diberi kelonggaran untuk meneruskan perjalanan pulang ke kampus.

"Bagi pelajar kategori berkeperluan khas yang perlu mengikuti sesi kuliah secara fizikal, kumpulan ini dibenarkan kembali ke kampus bermula 29 Mei ini mengikut ketetapan jadual yang akan dimaklumkan oleh USIM.

"USIM sentiasa mementingkan keselamatan pelajar. Dalam masa sama, pihak kami berusaha memastikan pelajar dapat meneruskan pelaksanaan Pengajaran dan Pembelajaran (PdP) dengan baik," katanya.

Menurut kenyataan itu, pelajar hendaklah terus mematuhi prosedur operasi standard (SOP) ditetapkan dan sentiasa peka dengan pengumuman daripada pihak USIM dari semasa ke semasa.

Kementerian Pendidikan Tinggi (KPT) sebelum ini mengambil inisiatif melaksanakan Program Pergerakan Pelajar Institusi Pengajian Tinggi (IPT) Pulang sempena Cuti Perayaan Aidilfitri 2021 bermula 7 hingga 12 Mei lalu.

Seramai 1,979 pelajar USIM yang berada di kampus terbabit dalam program pergerakan pulang ke kampung halaman masing-masing.

Daripada jumlah itu, seramai 538 pelajar diantar pulang menggunakan kenderaan universiti.

Mengikut perancangan awal, pelajar USIM dibenarkan pulang ke kampus secara berperingkat bermula 17 sehingga 23 Mei ini.